

# Luzius ha purtà la glisch da la cretta en Rezia

In med didactic per il stgalim mesaun, betg mo per l'instrucziun religiosa

■ (cp) Il nov med didactic «Luzius – Wie das Licht des Glaubens nach Rätien kam» cun trais unitads d'instrucziun independentas vegn preschentà a la publicità il 13 da november a chaschun d'ina vernissascha. Il med didactic, concepì dal pedagog da religiun Lars Gschwend, è ina publicaziun da la Mediateca ecclesiastica dal Grischun. Il punct da partenza per l'unitad d'instrucziun n'èn betg mo l'istorgia e la legenda da s. Gliezi, mabain er il mund dals uffants, en spezial da las scolaras e dals scolars dal stgalim mesaun, per ils quals l'ovra è vegnida concepida.

A maun da las legendas, istorgias, dals viadis fantastics, texts tematics, artitgels da gassetta e maletgs percorschan ils uffants co che la legenda è oz anc preschenta e co ch'ins po s'occupar d'ella. La chapientscha dals uffants per la relaziun cun

la natira, surtut cun ils animals sco era la forza da persuader senza violenza è tema che l'autur ha tractà per il rom «enconuschientscha da las religiuns ed etica» sut l'aspect didactic-metodic ed orientà a la cumpetenza.

La publicaziun cumpiglia era l'artitgel scrit spezialmain per quest med «Lernen an der Biografie des heiligen Luzius – Religionsdidaktische Hinführung» da *Christian Cebulj*, professor a la Scola auta da teologia Cuira. Il med didactic cuntegna era la «Lucius-Vita», ina pregia festiva scritta en latin enturn l'onn 800 s. Cr. e transladata en tudestg il 1984 dad *Albert Gasser*, professor emerità da la Scola auta da teologia Cuira. A la vernissascha vegnan A. Gasser, Christian Cebulj e l'autur dal med didactic a referir davart s. Gliezi, l'occupaziun cun l'istorgia ecclesiastica ed il svilup da quest med didactic.

Cun quest med d'instrucziun cuntinua la Mediateca ecclesiastica GR ina atgna tradiziun, numnadamain da metter a disposiziun a las scolastas ed als scolars da religiun meds d'instrucziun orientads a la pratica. «L'enconuschientscha da l'istorgia è impurtanta per chapir bain il preschent.» Sin questa idea sa basavan er ils meds didactics cumparids pli baud «Religiöse Auseinandersetzungen im 15. und 16. Jahrhundert in GR» e «Martin Luther King – Der Traum von einer besseren Welt». Tut ils trais meds didactics èn concepids tenor aspects ecumenics e pon era vegnir utilisads ordaifer l'instrucziun religiosa, per exempel en il rom «istorgia».

**Il med didactic pon ins comprar per 20 francs tar la Mediateca ecclesiastica GR, Welschdörfli 2, 7000 Cuira**